

CANDIDATONAN CLUB CARIBE

A ELIGI PRINS Y PANTHO

SAN NICOLAS, 9 febr.- Den un fiesta carnavalesco sumamente bon anima, a tuma lugar Diasabra anochi ultimo den Club Surnam na San Nicolas, e eleccion di Prins y Pantho di Aruba pa Anja 1965. Apesar cu e asistencia publico pa e ocasion aki tabata menos cu por a worde spera, sin embargo e por worde yama un exito pa e Comité Central di Carnaval 1965 cu a organisa e programa aki. For di e cuatro candidatonan pa e titulo di Prins Guy Paris di Club Caribe a logra combenci e hurado cu e cu su Pantho ta esnan cu por domina "locura" di Carnaval e anja aki.

E fiesta bailable tabata acargo di Sensacion Musical, cual hunto cu "Long Gun Steelband" a percursa pa e publico tabatin bon musica alegre pa baila e anochi. Mas o menos diez'or y mei pa diez un'or y mei e candidatonan pa Prins y Pantho a hanja e oportunidad di demostra publico presente kiko nan por. A competi, representantenan di Club Aruba Jrs., Club Surnam, Club Bonaireano y Club Caribe.

Cu chistenan original y bon poni e prins y pantho di Caribe, Prins Pegasaya y Pantho Bringamosa,

respectivamente Guy Paris y Federico Oduber a duna e publico un cuartodiora pa hari nan baricayen. Club Caribe alavez a percursa pa un grupo formal pa apoya y aplaudi nan candidatonan. Despues di e presentacion e hurado cual e biaha aki tabata consisti for di cinco persona cu a worde escohi den e sala, a hanja e tarea di bai conta e puntonan.

Diezdos'or di anochi senjor Milo Croes, presidente di e Comité Central di Carnaval a anuncia e ganadornan. Despues di esaki e fiesta bailable a continua te den e oranan di marduga.



Diabierna anochi e clubnan juvenil di Aruba a tene den Club Bonaireano na San Nicolas, e eleccion di nan Prins y Pantho Juvenil pa e Carnaval venidero. For di e cinco candidatonan, Nelo Loefstop, como Prins Catoochi a keda eligi como Prins. Nelo Loefstop a representa SUE Thompson Fan Club cu su Pantho Chokeke, esta Persey Jeandor. Aki nos ta mira e pareha di Prins y Pantho, na robez "Chokeke" y na drechi "Catoochi".

E hurado cu a eligi e Prins y Pantho Juvenil tabata di robez pa drechi, senjornan Oiky Posner, Leo Kuiperi, Leo Berlinski, Jose Trappenberg, y Lorenzo Arends.

